

Artistanan local ainda ta lucha pa por demostra nan arte

Tur producto cu Aruba su nomber riba dje ta traha na Ecuador



ORANJESTAD (AAN): Aruba ta un pais turistico, hopi ta e turistanan cu ta bishita Aruba pa asina conoce e cultura di Aruba. Tin diferente actividad cu a wordo crea pa e turistanan por pasa vakantie trankil na Aruba y asina tambe conoce un poco mas di e cultura di Aruba. Gobierno a percursa pa e tin un museo cu por brinda actividadnan pa tanto local y turista. Tambe tin Parke Arikok cu varios informacion valido di nos naturaleza. Asina por keda menciona diferente actividad cu e turistanan por acudi na nan pa conoce e identidad di nos cultura y nos historia. Sinembargo e turistanan no lo keda sin cumpra un recuerdo di Aruba prome cu nan subi nan avion y bolbe bek nan pais. Pa varios aña Aruba conoce e waf chikito unda cu antes tabata bende fruta fresco cu tabata bin den e boto chikito for di Venezuela. Despues di aña Aruba a desaroya y na unda cu no tabata bende fruta fresco mas na waf chikito debi cu nan a cuminsa dreña e supermercadonan.

Despues di tempo e waf chikito a bira e caminda cu ta bende artesanianan y pana cu diferente emblema di Aruba riba dje, pero cu no tabata traha na Aruba mes. Despues di tempo a trata di saca e personanan for di waf chikito y a pone e kiosconan na entrada di porta di waf grandi.

For di e tempo ey ya caba a descubri cu no ta artesanianan local ta wordo traha pero cu ta obhetonan traha y importa door di Ecuador, Peru y hasta China y na unda cu ta pone solamente e nomber di Aruba riba dje pa ilustra cu e ta di Aruba. Masha poco ta traha di productonan di Aruba.

Despues di e mudamento di waf chikito pa waf grandi hopi di nos artistanan local a sera nan luga y a stop di bende nan artesanianan unda cu awe por tuma nota cu ta un otro grupo a tuma e mercado aki over.

Sinembargo despues di tempo e kiosconan a wordo kita for di dilanti porta di waf y nan a muda nan un biaha mas banda di bushalte na playa of mas den e parkinglot patras. Asina aki e desaroyo a tuma luga y te ainda e kiosconan no tin un caminda stabil y



concretiza pa nan bende nan productonan.

Awor Aruba conoce waf chikito, e kiosconan banda di bushalte, un paar riba e parkinglot y awor un plaza nobo dilanti di ex DOW. DIARIO a combersa cu algun trahado y a duna di conoce cu tur producto ta bin di Ecuador, Peru y China y nan no ta pone "Made in Ecuador of Peru of China- Aruba" door cu e no lo ta un propaganda husto pa Aruba. Sinembargo nan lo ta desea di traha hunto si e artistanan local por bende nan e producto y nan lo rebende e producto local na e turistanan.

E artistanan local ta cana bende nan productonan riba nan mes na e hotelnan. Aruba ta un pais turistico y sigur mester pone nos artistanan local na prome luga pa nan por bende nan producto cu ta procedente di Aruba mes. Hopi biaha nos mester ta consciente cu e turista no ta bin Aruba pa cumpra un recuerdo cu ta bin di otro pais, pero un producto traha door di nos propio Arubianonan pa e tin balor pa e turista cu na momento e pone e recuerdo ey den su cas e por papia di Aruba y recorda e momentonan cu e la pasa na Aruba.